

Ja Africanconiabora pabíqui ani iqui. Asiai-
noabora pabíqui mašhcoshoco iqui. Jahuen queyá
riqui quimisha metrobobira. Jahuen ihue iti
atipanque 5,200 kilobo. Ja elefante ahuinra
baquenai 20 o 22 ošhe senenquetian. Jahuen baque
picóbenacan ihue riqui 90 kilo.

Jahuen requimanra šhobi biai. Bišhonra acai,
requin huequianan quešháin niašhon piquin. Ja
elefante requin riqui coshi. Janra acai, jihui
rastonbi huaquequin. Jahuen šheta riqui quiquin-
bires copí.

Ja yoinnaninra ochó oinyamataniai, išhonbira
šheteai, itan nincatai. Nonra raeati atipanque
teemanošhon.

Jonin jaconmaa ronqui jahuetianbiqui shinan-
benoti atipanyamaque, ja yoinna. Jahueranoqui ja
joni nocoai jatian ronqui copíti atipanque.

1. ¿Jahuetii ošhe senenquetianqui elefante ahuin
baquenai?
2. ¿Jahuequescárin elefante?
3. ¿Jahuetii kiloyaqui icai ja elefante baque
picóbena?

Ovejara jaque pasto jaaincobores. Ja yoinna-bora ichašh niaibo iqui. Ja yoinna riqui jonin queen, jahuen nami noeshaman copí, jainoašh jahuen rani jaconhira copíribi. Ja oveja riqui raqué, yoinna. Jan coíranai jonira pastor acanai. Ja pastorninra boai, šhobi jaaingo, ja pimanošhon. Ja yoinnabaonra piái huacan acai quescáribiaquin, jainšhon chibon acai quescáribiaquin. Jascara išhonra acai nacašhonmabipari šheašhon, jaquiribi picoquin. Picošhonra nacašhon šhearibiai.

Non oinnai jahuen yora raston quescá, itan jahuen mapo mašhcoshoco. Jascara non oinnai riqui jahuen rani quešhtó icašh. Ja yoinna ranira rapes-tecanai, ja ati bestétininbiribi; icašhbi moa matsi huinota pecáopari. Moa rapestea pecáora jahuen rani beríbai. Baritiatibira jascáacanaí. Ja oveja ranira patsášhon fabricancošhon yoman acanai. Ja yomanbiribira acanai chopaaquin.

1. ¿Jahue janerin jan ovejabo coíranai joni?
2. ¿Jahue quescáaquinqui piái?
3. ¿Jahueatirin jahuen rani?

Ja chimpancé riqui Africamea iso, nequea ison ehua quescribi; icašhbi joni jisá. Jahuen queyá riqui ani, ponyan nenqué, icašhbi jinaoma; jahuen requin iqui panchá. Ja yoinnara jaque níí bochi-qui. Ja ison ehua iqui níí bochiqui naaya, jain ošhai.

Huetsatianbora main niai; icašhbira jahue-tianbi noa icai quescati niamai. Jara niai, nequea shinobo icai quescatiribi.

Ja chimpancé riqui quiquinbires raqué. Janra jahuetianbi joni jahueayamai. Icašhbi isin atimares iqui; isin acanapari onsá iqui. Jainoašhšhibi iqui quiquinbires onan onanbires. Jainšhon ishton-biressibi jahuéquibo oinšhon onanai. Janra piai parantabo, jainšhonribi cocoai mescó bimibo. Jainšhon piai isá bachibo, itan huetsa jahuéquiboribi.

1. ¿Jahuequescárin chimpancécan jina?
2. ¿Jahueranoqui chimpancécan naai?
3. ¿Jahuetianqui chimpancé siná iqui?

Ja riqui nequea neíno quescáribi icašhbi aniparonmeabiribi. Jara jaque Rusiain, Franciain, Itáliain, Españain, Canadáain, Estados Unidosain jainoašh Mejicoain. Ja riqui ani ochítitioribi. Ja yoinna riqui sináyora, itan ononyoraribi. Jabora niai icha. Huestíora benera niai jahuen ahuin betan jainoašh jahuen baqueshocoboya. Jascara išhonra huestíora huaca merašhon reteti atipancanque.

Jabora ochó niai jaton piti benai. Ja neínoninra piai conejobo, šhoyabo, jainoašh jahuéqui mahuábo. Jainšhonribi yapa yatanti atipanque, benésainoa.

Ja neínora raquáyora icašh onon iqui. Ratéšhonra jahuen baquebo potai. Jaton caibo huestíora mahuáquetianra, moa jabi picanai. Ja neínora yamé queotai.

1. ¿Jahuequi neínonin piai?
2. ¿Jahuetianqui neíno queotai?
3. ¿Jahuequescárainboqui neíno jaa?